

## 迷暈拐童：犯案手法簡單 公園遊樂場高危



公園多小朋友，是拐子佬出沒的高危點。(梁鑫文攝)

香港城市大學犯罪學家黎定基表示，在現實世界，拐帶小童的手法並非如電影橋段般複雜，拐子佬為免落手時小童不斷掙扎，一般會利用哥羅芳、迷煙或將迷暈劑混入汽水，讓小童飲用將其弄暈後並迅速帶走，指出「用哥羅芳整暈咗之後(拐子佬)抱住佢，啲人以為抱住小朋友」，旁人根本難以察覺。

黎續稱，在公園及遊樂場，由於多小朋友，故拐子佬容易尋找目標；其次小朋友玩到興高采烈、得意忘形，或者沒有察覺潛在的危險性，加上家長、家傭未必能時刻「取實」照顧下，當小朋友不在大人視線範圍，便容易被人捉走，形容「個小朋友走出瀉滑梯，瀉完跟住畀人拎走咗都唔知啦。」現時科技發達，他建議家長可為小朋友配置距離感應器，設定當小童走出家長約三至五米範圍時，感應器會發出聲響通知家長，以提高警覺性並及時尋回子女。

防止虐待兒童會署理總幹事黃翠玲表示，家長帶小朋友出街時要「睇實拖實」，盡量不要讓他們自己行開，保持身處在視線範圍之內。家長亦可教導子女，不要隨陌生人離開，被人強行拖走時要高呼求救。至於鄰舍間亦要守望相助，若發現小朋友神情呆滯，同行者有異樣，要主動上前了解「問多幾句」，發覺有可疑便應立即報警求助。

香港保護兒童會總幹事蔡蘇淑賢亦指出，身處街外，家長要提高警覺，並讓小童保持在視線範圍之內。她又指，來港女傭或不熟悉本地文化，故僱主要給予她們清晰指示，以協助女傭在戶外看管小童。最後，家長亦要恆常教導小童如何應對及提防陌生人。

### Reference:

[http://hk.on.cc/hk/bkn/cnt/news/20180413/bkn-20180413210326602-0413\\_00822\\_001.html](http://hk.on.cc/hk/bkn/cnt/news/20180413/bkn-20180413210326602-0413_00822_001.html)